

Date – 14/03/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN

HEADLINES (EVENING)

1. Home Minister Pu K. Sapdangan KMMTTP hawn hun atan tun atanga theihtawpa lo in râlrin a, a tha zawnga hman dan tura lo inbuatsaih chu hna hmasaa neih a ngai a ti.
2. Sorkar laipui scheme PM-JUGA hnuaiah Mizorama khaw 12-ah man chawia riahna, Homestay sak tum a ni.
3. Prime Minister Narendra Modia chuan vawiin khan Silchar atangin hmasawna project heng vaibelchhe sing 2 sang 3 leh 550 hu a hawng.
4. Ramchhungah petrol leh diesel harsatna awm lova hralh chhonzawm a ni.

<><><>

HOME MINISTER

Home Minister Pu K. Sapdanga chuan Kaladan Multi Modal Transit Transport Project (KMMTTP) hawn hun atan tun atanga theihtawpa lo in râlrin a, a tha zawnga hman dan tura lo inbuatsaih chu hna hmasaa neih a ngai a ti.

Vawiina Zorinpui leh Solid Waste Management System, Lawngtlai te a enfihaah Home Minister, UD&PA Minister ni baw chuan he thu hi a sawi a. Minister chuan KMMTTP chu zawhfel a nih chuan sumdawna lian zawk kalpui a nih dawn thu sawiin Lawngtlai bakah, Mizoram hmun hrang hranga chengte tan hmahatna tam tak a thlen dawn a, chhungkaw tam tak tan eizawna tha tak a siam dawn a ni, a ti a. Hmasawna chuan a chhe zawnga Zoram mipuite a nghawng a hlauhawm hle tih tarlangin, tun atanga theihtawpa lo in râlrin a pawimawh a ti.

Home Minister chuan Mizoram tana chhenfakawm leh malsawmna ni turin theihtawp chhuah a tul tak zet tih a sawi a. Malsawmna tura sawrkar hmalakna chu mualphona thlentu a ni thei tih hriatreng a tul tih a sawi a. Malsawmna thlentu ni turin sawrkar, NGO leh Zoram mipuite inbuatsaih a pawimawh hle tih a sawi a. A bik takin Lawngtlai chu chhim kawtchhuah ropui a ni dawn tih tarlangin, neitu thinlung pu tur leh a tha zawnga chhawr tura rilru lo inbuatsaih tlat turin a chah nghal baw.

UD& PA Minister hian Lawngtlai 'Solid Waste Management System' tlawh nghalin hnathawh kal mekte a enfiha a. Lawngtlai khawpuiin bawhlawh sawngbawlina tha tak a nei tur chu lawmawm a tih thu sawiin, peih fel a nih hunah

chuan Lawngtlai khawpuiin faina leh thianghlamna kawngah nasa takin hma a sawn phah dawn tih a sawi a ni.

<><><>

MZP

MZP President Dr. C. Lalremruata chuan India danpui hnuaia 8th Schedule-a Mizo tawng dah tum chu Zohnahthlak hnam peng hrang hrangte hmin kim theih hunah ni thei se a ti.

Akahnsvani-in a kawmnaah he thu hi sawiin mi tam takin Mizo tawng 8th Schedule-a dah chu thil tha tak niin zirlai pawl tan tak pheii chuan ram pum huap hna exam hrang hranga Mizo tawng ngeia exam theihna tur, zirlaite tana tha tur a ni lawm ni tia an zawh thin thu a sawi a. An ni pawhin chu chu tha an ti tho tih sawiin hetihruah hian Mizo tih chu khawi lai nge, Mizo tihah Mizo hnuaia hnam peng hrang hrang te an hmin kim em tih chu an ngaih pawimawh thu a sawi a.

Dr. C. Lalremruata chuan MZP hnuaiah hnam pual zirlai pawl 8 lai in affiliate an awm thu sawiin heng hnam hrang hrangte hi Mizoah an la hmin kim lo aniang a tih vangin tuna 8th Schedule-a Mizo tawng dah tumna chu hun kal leh hret se, Mizoa hmin kim hun a awm an beisei tih a sawi a. Chutih hunah chuan MZP chu 8th Schedule-a Mizo tawng dah duh ber ber tu an ni dawn a ti a ni.

Byte of Dr. C. Lalremruata

Dr. C. Lalremruata chuan hei hi an tanna a nih angin nikum November thlaa Mizo Language Development Board te nena an inkawmkhawmnaah pawh tha taka an sawiho thu a sawi a. Nghah hreta Zohnahthlak hnam peng hrang hrangte hmin kim theih hunah an duh thu hemi tumah pawh hian an sawi tih a sawi a ni.

Puan tawh angin, MZP leh Jt Hnampual Zirlai te chuan India Constitution schedule pariatna hnuaia Mizo tawng telh tura hmalakna tur resolution Education Minister Dr Vanlathlana'n session a putluch chu hun lo an tih thu leh, MZP leh Hnampual zirlaiten thutlukna an la siam ve loh thu an lo sawi tawh a. Kar kalta ni 9 khan Education Minister Dr Vanlathlana resolution hi house chuan a pawmpui a ni.

Hemi chungchanga Aizawla thuthar thehdarhtute an kawmnaah MZP President Dr C Lalremruata chuan ah MZP leh Jt. Hnampual tangkhawmte chuan Eight Schedule of the Constitution of India-ah Mizo tawng telh tura hma lak tur thu an pass tak ah session a Education Minister leh Chief Minister ten MZP leh Hnampual zirlai an pawmpui thu an sawi lan ah -an pawmpui thu emaw remtihna an sawi chhuaklo an ti a,

MZP President Dr C Lalremruata chuan zofa hnam hrang hrang zingah hian 8 Schedule ah Mizo tawng dah dawn se tute tawng nge mizo tawng tih leh tute tawng nge awm se tih chu an ngaihtuah na leh an zawhna anih thu a sawi a, zo hnahthlak hrang hrang te tawng hi Mizo tawng a nih vek thu sawiin – Lusei, Hmar, Paite leh Lai ah hian a khawi ber nge Mizo tawng tih ah dah anih dawn a ti a, hemi chungchang hi MZP leh Hnampual Zirlai pawl hrang hrang te an pawm tlan theih hunah pass nise an duh thu a sawi a ni.

MZP leh Hnampual Zirlai te leh Central YMA ten Mizo Language Development Board te inkawm khawmnaa an minute bu ah pawh a la hun hrih loh

thu leh nghah hrih phawt an duh thu an ziah lan laia Assembly Session ah Education Minister leh Chief Minister ten MZP leh Hnampual zirlai pawlten an pawmpui ni anga an sawi chu mak an tih thu a sawi a, Mizo Language Development Board hnuaia Eight Schedule Study Group ten sorkar hnenah thudik tawlo an thlen ni ngeiin an ngai a ti a ni.

Hetihlai hian, Mizo Writers Association chuan Assembly Budget Session neih meka "Eighth Schedule to the Constitution of India-ah Mizo tawng hi telh tura hma lak ni rawh se" tih pass a ni chu lawmawm an tih thu an sawi a.

Vawiina thuchhuah an siamah he thu hi tarlangin Mizo Writers Association chu Mizo ziaik miten hma an sawn theihna tura pawl din a nih thu an sawi a. An hmalakna zinga pawimawh tak Mizo ziaik mite tana hmasawanna a awm theih nan India danpui 8th Schedule-a Mizo tawng dah chu a pawimawh hle tih an sawi a. 8th Schedule-a Mizo tawng dah a nih chuan Mizo ziaik mite tan hamthatna leh hmasawanna tur tam tak a awm thei dawn tih an sawi a ni.

Mizo Writers Association chuan Zohnathlak hnam peng hrang hrangte tawng humhalh a, tihhmasawn a tulzia hriain theih tawp chhuahin hma a la zel dawn tih an sawi a. Chutih rualin, tuna hman mek 'Mizo tawng' chu Zofate inbiak pawh tawn theihna leh hman tlanglawn ber a nih avangin inpumkhatna atan a pawimawh tih an sawi a. Hma a sawn zel theihna tur leh a than zel theih nan hma an la mek zel tih sawiin Mizo tawng chu Zohnathlak chi peng hrang hrangte tawng infin khawmin a siam a nih avangin Mizo tawngin hma a sawn rualin chi peng dang tawngte pawhin hma a sawn ve zel an beisei tlat thu an sawi a ni.

<><><>

12 PM-JUGA HOMESTAYS PROPOSED FOR MIZORAM

Pradhan Mantri Janjatiya Unnat Gram Abhiyan (PM-JUGA) hnuaiah khaw 12-ah man chawia riahna, Homestay sak tum a ni.

Assembly Session neih meka ziaka zawhna chhangin Tourism Minister Pu Lalnghinglova Hmar chuan he thu hi a sawi a. PM-JUGA hnuaiah hian Homestay sakna atan Detailed Project Report chu sorkar laipui, Ministry of Tourism portal-ah nikum August Ni 7 khan thelulh a nih tawh thu Minister chuan a sawi a ni.

Minister in chhanna a tarlan danin PM-JUGA hnuaia Homestay sakna turin khaw 12 thlan chhuah a ni a. Heng khua te hi Sialsuk, Sailam, Chhuanthar Tlangnuam, Hmuntha, Ngentiang, Leng, Cherhlun, Pangzawl North, Tuipui D, S. Vanlaiphai, Darzo leh Sangau a nih thu a sawi a. He scheme hnuaiah hian Homestay pakhat sakna turin cheng nuai 5 zel sorkar laipuiin a ruahman tih a sawi a. A project hi ministry lam chuan an la sanction loh thu leh sum pawh an la tihchhuah loh thu a sawi a ni.

VC of Corr

PMJUGA hi India sorkarin ramchhunga tribal tamna khaw hrang hrangte hmasawanna tur a duan a ni a. India ram puma PMJUGA atana sum hman tur hian cheng vbc 79,156 a ruahman a. PMJUGA hian India ram chhunga district 549, leh block 2,740 te a tuam dawn a. He scheme hnuaia hmalakna hrang hrang zingah tribal awm tamna khaw hrang hranga khualzin hip deuh tura ngaihah te man chawia khualzin te an riah theihna tur 'homestay' hi a tel a. Hemi hnuaiah hian Mizoram chhunga khaw 12-ah te hian homestay pakhat theuh duan a nih ve theih

nan sorkar chuan sorkar laipuih rawtna, proposal kan tih hi a kalphung mumal tak zawmin a thawn ve a ni.

<><><>

WEATHER

Tunhnaia ruahsur chuan boruak a ti dai hret a, India Metereological Department, Aizawl Director Pu Sudhir Kumar Dwivedi chuan ni hnih thum lo awm turah boruak a vawh hret beisei a ni a ti.

Pu Sudhir Kumar Dwivedi chuan nimin khan ruahtui mm 3.4 vel Mizoram in dawn thu a sawi a. Vawinah hian ruah tlem a zawng a sur leh rin a nih thu sawiin ruah a sur theihna hmun te hi Saitual, Serchhip, Champhai, Khawzawl, Mamit, Kolasib leh Aizawl district a ni a, hmun dangah chuan ruah a sur loh theih thu a sawi a ni.

<><><>

MPYCC

Congress Party Thalai pawl MPYCC chuan AMC term tawp tawh pawhseina dan pawh awm lo, Urban Local Bodies awm lovah Mizoram khawpui Aizawl chu enkawltu mumal awm lovin ZPM sorkar in a dah an ti a, hei hi AMC inthlan a hun taka an hmachhawn ngam loh vangah an ngai tih an sawi a ni.

Hemi chungchanga vawiina thuchhuah an siamah State Assembly Session te, School naupang Exam avangtea AMC inthlan sawn hlat chu an la hriat ngai loh thu an sawi a, ZPM chuan an chan thatna tur a nih chuan VC leh LC inthlan hun pawh mipui thlan chhuahte term pawh tawi sak avanga Court hial kal ngai khawpin an lo sawn hma tawh a, tunah AMC inthlan a hun taka inthlang thei lovin an sawn hla leh ta hi phuachawp sorkar an nihna leh kalphung thar rintlak loh zia tichiangtu a ni an ti.

ZPM sorkar chuan an sorkar hnuah LADC, Dampa MLA Bye-Election, VC leh Local council inthlan te an hmachhawnah an chetchhiat em em vek avangin tunah hian Mizoram khawpui Aizawlin enkawltu nei lo ang maia a awm mek nachhan chu AMC inthlan a hun taka an neih ngam loh vang a ni an ti a. An sorkar hnuah budget wawi 3 an pharhna a ni ta a, thal wawi hnih kawng an siam lo va, AMC inthlan dawnah Election neih dawn avanga mipui rilru suk nan Aizawl khawpui kawng siam that a, Pukchawpa Sawhthing tlem a zawng lei hman hram leh Budget Session-a mipui mit leh bengkhawn zawnga chet hnua AMC inthlan an duh vang mai a ni an ti.

MPYCC thuchhuah chuan, AMC hi a kalphungah chuan kum 5 chiah zelah a tawp a, kum 5 chiah zela a term pawh hi a thar piang zel tur a ni an ti a. AMC inthlan hun hetiang a nih avang hian a hun taka office pawh luah chat chat tura ngaih an ni. A hunah inthlan theih loh a awm thei a, mahse, hei hi danbuah a lang lo a, chung danbu a lang lo inthlan ti danglam thei chu Pandemic emaw Epidemic emaw National level or State Level buaina a ni tur a ni.

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchintha puan leh a ni ang.

<><><>

PM IN ASSAM

Prime Minister Narendra Modia chuan vawiin khan Silchar atangin hmasawna project heng vaibelchhe sing 2 sang 3 leh 550 hu a hawng. Pu Modia hian Silchar leh Shillong inkar cheng vaibelchhe sing 2 sang 2 leh 864 senga expressway hna bultan tur tawngtaina hun a hmang bawk a ni. He expressway hi hmarchhaka a hmasa ber tur a ni a. Km 166 a thui four-lane tur a ni a. Guwahti leh Silchar inkar darkar 8 leh a chanve tlan ngai thin chu darkar 5 chhungin a thlen theih tawh dawn a ni. Prime Minister Modia hian NH-306 a Trunk Road tihsanna tur project a hawng bawk a. He project hi Capital Point atanga Rangirkhari Point ami a ni a, he project hi a zawh hunah chuan Silchar kawngpui tawt tak a ti ziaawm anga , thenawm state Mizoram, Tripura leh Manipur te nena inkalpawhna pawh a awlsam phah tawh dawn a. Barak Valley tan hmasawna tam tak a thlen dawn a ni. Hei bakah hian Karimganj district-a Patharkandi ah College of Agriculture cheng vaibelchhe 122 senga din tur lungphum a phum bawk a ni.

Thusawiin Pu Modia chuan hmarchhak chuan tunah hian India Act Eat Policy ah a hmahruaitu dinhmun an luah mek a ti a. Barak valley chu hun rei tak chhung ngaihthah anih hnuah tunah chuan Asia hmarchhak kawtchhuah pawimawh tak a lo ni thei ta a ti bawk.

<><><>

FUEL

Ramchhungah petrol leh diesel harsatna awm lova hralh chhonzawm a ni. Union Ministry of Petroleum and Natuaral Gas chuan thuchhuah siamin ramchhung hmun hrang hranga petrol pump ah te mamawh khawp tualhthei an nei a ti a. Mipuite chu chia lo tura chahin pump atanga petrol lakkhawl a, mahni remchan dan anga lo chhekkhawl chu a him loh vangin mipuite ti lo turin an ngen a. Petrol pump neitute pawh hetiang a loose-a tualhthei lo lak hi phal lo tur leh mipui himna tura dan zamte tha taka zawm turin a hriattir a ni.

<><><>